

A Orde do 19 de xaneiro de 2021 pola que se modifica a Orde do 3 de decembro de 2020, na que se establecen medidas de prevención específicas como consecuencia da evolución da situación epidemiolóxica derivada do COVID-19 na Comunidade Autónoma de Galicia, no punto terceiro dispón a suspensión das competición deportivas de nivel autonómico e someten os adestramentos ás mesmas limitacións co resto da actividade física e deportiva non federada, é dicir, de forma individual ou colectiva ata un máximo de catro persoas, sexan ou non conviventes, excluíndo o monitor.

Dende a Unión de Federacións Deportivas Galegas somos conscientes da grave situación sanitaria que está sufrindo o noso país e queremos trasladar todo o noso apoio as persoas que están loitando para superar esta situación e ofrecer a nosa colaboración en todo o que sexa necesario.

A suspensión das competición deportivas de nivel autonómico déixanos **moi preocupados**, porque creemos firmemente que o deporte é parte da solución;

- Somos unha **actividade regulada**, que desenvolve a súa labor dunha forma impecable.
- Traballamos durante meses na **confección de estritos protocolos**, avalados por recoñecidos expertos e aprobados pola esixente administración pública.
- Temos a **experiencia de varios meses de competición** durante a pandemia, praticamente sen incidencia do virus no deporte.
- É destacable a **importancia que está tendo o deporte federado no cribado e control da pandemia**, o deporte galego realizou máis de 35.000 test de detección do COVID-19.
- Somos unha **actividade esencial para evitar o sedentarismo e as enfermidades derivadas do mesmo**.
- Ademais de **fortalecer o noso sistema inmunolóxico e psicolóxico**, serve coma medio de evasión para desconectar das desgrazas que tristemente nos está a tocar presenciar.
- **Complementamos a formación académica e familiar** que reciben os nosos pequenos/as.

Por todo o dito, nos últimos meses, o deporte federado galego acreditouse como un exemplo a seguir pola súa capacidade de adaptación e traballo, grazas a unha forte e crecente unión entre as Federacións que permitiu avanzar, sempre en colaboración coa Administración, pola recuperación dos adestramentos e competicións na nosa comunidade.

Esta liña de traballo, que primou dende o primeiro momento a saúde de todos os deportistas e do seu entorno, vese truncada polas medidas tomadas, abrindo un período de moita incerteza polos diversos efectos que causará a paralización indeterminada das competicións e do desenvolvimento natural dos adestramentos.

Sendo conscientes da adversa evolución das últimas semanas, dende a Unión de Federacións Deportivas Galegas reiteramos o noso total compromiso na loita e control da pandemia, pero discrepamos en que a suspensión das competicións deportivas de nivel autonómico sexan o camiño para acadar ese obxectivo tan deseado por todos.

Orgullosos e agradecidos pola incansable labor realizada polas Federacións, clubs, directivos, deportistas, e por todo o deporte en xeral, agardamos que se escoiten todas as opinións na busca de consensos para afrontar o futuro con seguridade e certezas.

**Confiamos en estar de volta moi pronto** para continuar aportando, como sempre fixemos, a maior das nosas axudas. Desfrutaremos xuntos de novo, seguimos #ForteCoDeporte.

